

Date – 02/10/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

- 1. Vawiin Swachhta Hi Seva 2024 programme New Delhi-a neihah Prime Minister Narendra Modia chuan faina chu mahni nunphunga pawimawh bera dah turin mitin a sawm**
- 2. Vawiin khan ramchhung hmun dangte rualin Mahatma Gandhi a pianchamphapak vawi 155-na lawm a ni.**
- 3. Chief Minister Pu Lalduhoma chuan Serchhip District Hospital tur sa mektu contractor chu a hna chhonzawm zel turin a hrilh.**
- 4. Nepal tuilian avangin mi 228 an thi tawh**

<><><>

PM SWACHHTA HI SEVA

Vawiin Swachhta Hi Seva 2024 programme New Delhi-a neihah Prime Minister Narendra Modia chuan faina chu mahni nunphunga pawimawh bera dah turin mitin a sawm. PM Modia chuan Swachhta chu damchhung intiamna tur thil anih thu sawiin tumkhata tihhlawhtlin mai chi a ni lo a ti a. Swachh Bharat Mission kum 10 tlinna lawmna hun hman ni bawkin Pu Modia chuan India fai Clean India tihhlawhtling turin tan lak chhunzawm a ngai a ni a ti.

Pu Modia chuan ramchhung mipuite he beihpuia an tel that avanga lawmawm atih thu sawiin hmun tifaitute, sakhaw hruaitute, infiammite, milarte, NGO leh thuthar thehdarhtute thlengin Swachh Bharat Mission hlawhtlinnaah tha an thawh a ni a ti bawk.

Vawiina Swachhta Hi Seva Programme ah hian Union Minister for Jal Shakti C R Patil, Union Housing and Urban Affairs Minister Manohar Lal, Union Minister of State for Jal Shakti Raj Bhushan Chaudhary, Union Minister of State for Housing and Urban Affairs Tokhan Sahu, Ministry leh department hrang hrang Secretary te an tel a ni.

<><><>

CLEANLINESS WEEK CLOSED

Faina lama beihpui thlak kal mek chu tukin khan Lawngtlai DC Conference Hall-ah Adviser to Chief Minister (Health) Dr.Lorrain Lalpekliaana Chinzah hovin khar a ni.

Lawngtlai a Faina Hapta kharna ah hian Dr.Lorrain Lalpekliaana Chinzah chuan faina chu chhunzawm zel ngai a nih vangin tha thlah lova nasa zawka hmalazui turin Sorkar Department, Zirlai naupang leh mipui a sawm. Hapta kharna ah hian khawpui leh thingtlang lama faina lama hmalakna kalpui dan kimchang takin kalkhawmte hrilhhriat an ni a, hapta hman chhungin kawng hrang hrangin hmalak niin, Thingphun leh Plastic bawlhhlawh thenfai leh bawlhhlawh chhekkhawlna hmun thenfaite, Faina lama intiamkamna neihte chu hmalakna langsar zingah a tel.

Lunglei district-ah chuan Convention Center-ah faina beihpui thlak kharna inkhawm hi buatsaih a ni a. Hetah hian Lunglei Bawrhsap Pu R. Lalthazuala chu khuallian a ni a, SBM(G) leh SBM(U) report ngaihthlak a ni in hemi puala thuziak lawmman sem a ni bawk.

Serchhipah chuan Bawrhsap Pu Paul L.Khuma chuan vawiina Serchhip District faina beihpui thlak kharna inkhawmah thusawiin faina beihpui chu nitin, kartin, leh kumtluana hman a nih tur thu a sawi bakah faina chu mahni theuhva bultan a pawimawh thu a sawi bawk.

Khawzawl a faina beihpui thlak kharna inkhawmah Bawrhsap Pu K. Vanlalthiana chuan Faina leh hriselna chu a inkungkaih tlat thu leh hrisel tur chuan khawtlang bakah in leh lo pawh vawn fai a ngaih thu a sawi a, faina chuan Khawzawl district a tih hmasawn ngei a beisei thu a sawi bawk.

Mamit-ah pawh Faina Beihpui thlakna kharna hun hi hman a ni a, he huna thusawitu District Bawrhsap Pu Jacob Lalawmpuia chuan sawrkar department pisa, zirna In leh khawtlang anga hmalakna-ah theihtawp chhuah a ni tih mit ngeia hmuh theiha a awm thu leh hemi atana kawng an sah kuak tawh chu chhunzawm a District fai ber ni reng thei tura mahni theihna zawn theuha hmalak chhunzawm zel turin kalkhawmte a sawm bawk.

Vawiin a Kolasib DC Conference Hall-a faina beihpui thlak kharna inkhawmah District Bawrhsap Pu Robert C Lalhmangaiha chuan faina kawnga hmalakna chu a tawpna tur a nih loh thu leh Kolasib District chu khawtlang fai, veng fai leh chhungkaw fai an nih theihna tura a bul tanna chauh a nih thu a sawiin chu chu Swachhata Hi Seva in a tum ber a ni a ti.

<><><>

H1N1 OUTBREAK

Tlungvel khua a tlang hrileng, khawsik, khuh leh hritlang avanga sample 43 an lak endik zingah mi 32 te chu H1N1 hri kai an ni tih hmuhchhuah a ni.

Health & Family Welfare hotute hnen atanga thudawn danin Tlungvel khua-ah hian September ni 17 leh ni 28 inkar chung khan hritlang khawsik leh khuh vei mi 245 chu Tlungvel health & wellness centre-ah an inentir a. Hetiang a nih avang hian Tlungvel khua hi 'hri lenna khua' a puan a ni a. Thawhtanni khan Thingsulthliah Primary Health Centre (PHC) a laboratory technician chu tirin mi 43 sample a la a. Hei hi Thawhlejni khan Aizawl lamah thawn thla-in Zoram Medical College-ah endik a ni a. Sample 43 zinga 32-te chu hritlang chi khat H1N1 kai an ni tih finfiah a ni a. H1N1 hi 'influenza 'A'

virus' ti-in an sawi a, sawi dan thenkhatah chuan 'swine flu' an ti bawk a ni. Doctor-te chuan hritlang kaite hi ngaihtuahawm leh na tak an awm lo niin an sawi a, mi 245 zinga a tam zawk hi dam tawhin mi 70 vel erawh chuan an hritlang leh khuh a la dam chiang lo niin an sawi.

Hemi hma September ni 25 khan 'Chana Pawl' ti a sawite chenna Chhuanthar Tlangnuam khua-ah pawh hritlang khawsik a damlo hi mi 233 vel an awm a. An zinga mi 35-te sample endikna-ah an vai hian H1N1 hritlang natna an vei tih hmuhchhuah a ni tawh bawk.

Mithiamte chuan H1N1 hi natna inkaichhawn awlsam tak a ni chungin hlauhawm lutuk a nih loh thu an sawi a. Tlungvel-ah hian gospel camping an buatsaihna-ah a darh ni a hriat a ni a. Kar leh lama Presbytery inkhawmpui an thlen leh dawn avangin inkaidarh lo tura fimkhur a tul hle a an hriat thu an sawi a. Chhuanthar Tlangnuam khua-ah hian sikul atanga inkaidarh an ni a hriat a ni bawk.

<><><>

GANDHI BIRTHDAY

Vawiin India hnampa Mahatma Gandhi piancham vawi 155-naah rampumin zahna a hlan a. President Draupadi Murmu leh Prime Minister Narendra Modi ten Pu Gandhi-a pianchamah hian zahna an hlan a. President Murmu-i chuan mitinte chu Mahatma Gandhi-a zirtirna thudik, tharum thawhna tello, hmangaihna leh thianglimna chu ngaihlu tlat turin a chah a ni. Vawiin khan Rajghat-a Mahatma Gandhi-a hriatrengnaah President Droupadi Murmu, Vice President Jagdeep Dhankhar, Prime Minister Narendra Modi, Lok Sabha Speaker Om Birla, Union Minister, Lok Sabha Leader of Opposition Rahul Gandhi ten zahna pangpar an dah a ni.

<><><>

GANDHI JAYANTI

Mizoramah pawh Mahatma Gandhi a pianchamphaphak vawi 155-na a ni a, hemi ni pualin tukin zing dar 7:30 AM khan larsap Indra Sena Reddy Nallu bakah Mizoram Sawrkar mi pawimawh engemaw zat in Pachhunga University College (PUC) Campus, College Veng a, Gandhi a limah pangpar dahin zahna an lantir a ni.

Zahna lantir zingah Assembly Speaker Pu Lalbiakzama; Minister panga – Pu Vanlalhlana, Dr. Vanlalhlana, Pu Lalthansanga, Pu C. Lalsawivunga, Prof. Lalnilawma leh Assembly Deputy Speaker Pu Lalfamkima te an tel a. Anni bakah Chief Secretary Dr. Renu Sharma leh Sawrkar hotulu dangte pawhin he hunah hian zahna an lantir bawk a ni.

Mahatma Gandhi piancham puala hum hman zawh hian Governor chuan Cleanliness Drive – Swachhata hi Seva pualin Shramdaan (tual tihfai) a ho nghal bawk a ni.

Gandhi a piancham October ni 2 hi United Nations in kum 2005 khan International Day of Non-Violence ah a lo puang tawh nghe nghe a ni.

<><><>

CM-HOSPITAL

Chief Minister Pu Lalduhoma chuan Serchhip District Hospital tur sa mektu contractor chu a hna chhunzawm zel turin a hrilh.

Tukin khan Pu Lalduhoma chuan Serchhip PWD IB ah Serchhip khawtlang hruaitute nen inkawmna hun an hmang a. Serchhip District Hospital sak hna tan tawh, a sak phung tur her danglam deuh (change of scope) vanga Corporate Social Responsibility (CSR) sum petu Power Grid Corporation of India Limited (PGCIL) ngaichanga contractor-in chawlhan rih a tum chu thlamuang taka hna chhunzawm tura a hrilh thu a sawi. Chief Minister hian Health Minister phone-a biain a chah a ni. Chief Minister chuan, PGCIL ten CSR an rawn pek hi cheng vaibelchhe 21 a ni a. Chuta cheng vaibelchhe 18 chu a building sakna tur a ni a, a bak zawng chu hmanrua (equipment) leina tur a ni. Mahse, district hospital changlung tak sak na'n pawisa dah belh a tul avangin Serchhip Hospital atan hian North East Special Infrastructure Development Scheme - other than road infrastructure (NESIDS OTRI) atangin cheng vaibelchhe 65 dah belh tum a ni a. Hei hi NESIDS OTRI inkaihhraina siam angin cheng vaibelchhe 50 bak hospital atan dah theih a nih loh avangin cheng vaibelchhe 50 dah a ni ta a ni. Hei vang hian Serchhip hospital sak phung tur hi thlak hlek (change of scope) a lo tul ta a. PGCIL lam hian rem an rawn ti ang em tih contractor hian han ngaihchan deuh a tum a ni.

Hemi chungchangah hian Chief Minister chuan, PGCIL lam ngaichanga hun lo khawh ral hi a uiawm tawh avangin sum pek tul awm apiang hi NESIDS OTRI atanga lo pek mai theih a ni a. Contractor hian thlamuang takin hna lo chhunzawm se a duh thu a sawi a. A tul chuan sum hi an dap belh zel dawn niin a sawi a ni.

<><><>

SDRF

Sorkar laipui Ministry of Home Affairs chuan State Disaster Relief Fund (SDRF) leh National Disaster Relief Fund (NDRF atangin Mizoram tan cheng vaibelchhe 21 leh nuai 60 a rawn pe chhuak.

MHA thuchhuahin a tarlan danin SDRF leh NDRF atanga sum lo pek lawk hi furpui tuar state 14 te tanpuina tur a ni a. A vai chuan cheng vaibelchhe 5,858 leh nuai 60 a ni a. Pek chhuah zinga Mizoram chan tur hi cheng vaibelchhe 21 leh nuai 60 a ni. Kumin Cyclone Remal-in Mizoram a nuai hnu khan sorkar laipui atanga chhawm dawlna tur hi Mizoram sorkar chuan cheng vaibelchhe 237 leh nuai 60 zet June thla laihawl vel khan a dil a ni.

<><><>

NEPAL

Nepal tuilian avangin mi 228 an thi tawh a. Mi 25 chin hriatlohin an la awm. Ruahsur nasa avanga tuilian leh leimin hian mipuite harsatna namenlo a thlen a. Vanduaina thlenga hliam tuar mi 158 an awm belh leh a. Home Ministry sawidanin mi sing khat leh sang thum chuang chhanchhuah tawh an ni a. Tunah hian chhanchhuah leh chhawmdawl hna ngwrh taka thawh mek a ni.

<><><>